

Poem pou Fet Mama

Kouma to bien! Kouma to bien!
Dan so lebra kouma to bien!
Kan to gagn fin, kan to gagn fin
Se so lekor ki nouri toi.

Kouma to ge! Kouma to ge!
To ti lemonn bien proteze.
De lizie fier ki trakase
Pe vey toi fer to premie pa.

To rapel kan Claudette vini
Ar so divan ek so lapli
To ti leker ti pe tranble,
To ti leker ti pe sote.
Kisanla dan so de lebra
Ti anvlop toi pou konsol toi?
Kisanla sa? Kisanla sa?

Enn foi, asoir, to rapel bien,
Lafiev-kosmar kouma koltar
Ti pe bril toi ar marenoir
Dan tourbiyon enn lasesres.
To lekzistans ti menase.
Akote toi lor bor lili,

Lasours lavi ti pe veye.

Nou tou ti ge! Nou tou ti ge!
Lorkes ti pe fer nou danse,
Nou lespri ti pe voltize,
Nouvo lavi ki koumanse.
Laba dan koin pre kot gato,
Leker sere deryer sourir,
Vit-vit li ti efas enn larm
Pou ki personn napa trouve.

Li for, li feb, li zenn, li vie,
Li krint, li smart, li kabose
Li ankor pe vey to sime.
Dan so lizie fier-trakase,
Nanye napa kapav sanz sa,
To res ankor so ti baba
Ki li'nn nourri ar so lekor.

Anou sante! Anou sante!
Zordi so fet, anou sante.
Me selma fale pa bliye
Enn ti panse pou malere.